



Communicaziun da medias digl cumegn da Surses (nr. 15-2021)

Surses: igl cumegn sbassa igl pe da taglia communal

La radunanza communalà ò decida da sbassar igl pe da taglia communalà dad oz 100% sen nov 90% dalla taglia simpla digl cantun Grischun. Er igl preventiv 2023 tgi prevei en surple d'antradas da radond CHF 51'700 francs ed investiziuns bruttas da 12.87 milliuns è nia approvo sainza discussiun. Ultra da chegl ò igl suveran concedia divers credits, approvo la lescha da sepultura e santieri e decida da vender ena parcella ainten la zona d'industreia a Salouf.

Malgro tg'igl cumegn ò da far frunt a grondas investiziuns igls proxims onns, ò la radunanza communalà digls 12 da december decida da sbassar igl pe da taglia communal per la taglia d'antrada e da facultad per 10% e da la fixar pigl onn 2023 da nov sen 90% dalla taglia cantunala simpla. La reducziun è neida proponeida dalla suprastanza communalà, an consideraziun dallas finanzas solidas digl cumegn. Sen la decisiun ins è er sa baso segl plan da finanzas 2024-26.

Igl preventiv 2023

Tar antradas da radond 35.08 milliuns francs ed expensas da radond 35.03 milliuns francs prevei igl preventiv en surple d'antradas da 51'700.00 francs. Las investiziuns bruttas montan a 11.78 milliuns francs (investiziuns nettas 10.79 milliuns francs) e pertotgan cunzont l'infrastructura communalà, vot deir la sanaziun digl provedimaint d'ava e la dismessa d'ava persa e la sanaziun da veias communalas.

Concessiun da divers credits per projects d'investiziun

Alla basa digl preventiv 2023 ò la suprastanza dumando da conceder credits per divers projects d'investiziun. Uscheia ò la radunanza communalà concedia credits da total 6.38 milliuns francs per igls suandonts projects: planisaziun dalla construcziun nova dalla tgesa da scola Grava a Savognin, sanaziun dalla Veia Sumvei a Tinizong e la sanaziun dalla Veia Caross a Savognin scu er per igl provedimaint d'ava e la dismessa d'ava persa sen l'Alp Flex. Pinavant è er nia concedia igl credit da 0.7 milliuns francs per far la nova farmada digl auto da posta a Mulegns. Chel credit è pero nia concedia cun resalva, essend betg anc decida sch'igl cumegn u igl Uffezi federal da veias ASTRA/UVIAS è responsabel per la construcziun dalla farmada. Per cass tg'igl ASTRA/UVIAS è responsabel per la realisaziun digl project, davainta igl credit obsolet.

Lescha da sepultura e santieri

La radunanza communalà ò approvo unanimamaintg la lescha da sepultura e santieri digl cumegn da Surses. Chella vo an vigour per data digl conclus.

Siva dalla fusiun ò igl cumegn d'unifitgier schi spert scu pusebel la sia legislaziun. Anfignen tar la messa an vigour respectiva, applitgescha la suprastanza communalà, scu dretg transitoric, per igl territori digls cumegns uriunds lour leschas tgi èn anc an vigour.

Ulteriouras decisiuns

Sainza discussiun ò la radunanza communalà decida da fixar nignas restricziuns pertutgont las quotas per la vendita d'immobiglias ad esters pigl 2023, conform alla practica actuala.

Pinavant ò la radunanza accepto la dumonda d'en interessent da pudeir cumpar la parcella nr. 8219 cun ena surfatscha da 2'995 m2 cun annullar igl contract da dretg da biagier correspondent

pertutgont la parcella an dretg da biagier nr. 8239. La parcella sa catta ainten la zona d'industria
Gneida a Saouf.

Ulteriouras infurmaziuns dat igl mastral Leo Thomann (telefonign 079 405 96 73)

Tinizong, igls 15 da december 2022